

AKHBAR : BERITA HARIAN

MUKA SURAT : 5

RUANGAN : NASIONAL

Pemulihan COVID-19

Kluster baharu rumah penjagaan warga emas

Tiga individu dijangkiti sejak kes dikesan 17 Mei lalu

Oleh Suzalina Halid dan Noor Atiqah Sulaiman
bhnews@bh.com.my

Putrajaya: Kementerian Kesihatan mengesahkan kewujudan satu kluster baharu membabitkan rumah penjagaan warga emas di Kuala Selangor, yang kini menjangkiti tiga individu.

Ketua Pengarah Kesihatan, Datuk Dr Noor Hisham Abdullah, berkata dua kes pertama dikenal pasti pada 17 Mei lalu hasil saringan pusat penjagaan warga emas.

"Selepas hampir sebulan, individu ketiga pula didapati positif COVID-19. Beliau disahkan positif selepas menjalani saringan dalam kalangan pesakit Jangkitan Pernafasan Akut Teruk (SARI) dan kini dimasukkan ke Hospital Tanjung Karang sejak Sabtu lalu.

"Ini adalah saringan kali kedua diadakan terhadap individu kes ketiga ini dan beliau mendapat keputusan negatif ketika ujian pertama saringan COVID-19, iaitu ketika saringan pusat penjagaan warga emas," katanya pada sidang media harian COVID-19, di sini, semalam.

Dr Noor Hisham berkata, ujian saringan dilakukan ke atas 12 kakitangan pusat penjagaan berkenaan dan 26 penghuni dengan hasilnya mengesahkan semuanya negatif.

Katanya, pengesanan kes secara aktif dijalankan dan langkah pencegahan turut diambil termasuk operasi nyah kuman dan nyah cemar.

Beliau memaklumkan, sehingga kini saringan COVID-19 dilakukan di 421 pusat jagaan warga emas membabitkan 17,699 individu merangkumi penghuni, penjaga dan kakitangan.

"Daripada jumlah itu, sebanyak 15,848 sampel diambil dan 30 kes positif COVID-19 dilaporkan atau 0.2 peratus.

"Hanya lima individu atau 16.7 peratus menunjukkan gejala,



Pengesanan kes secara aktif dijalankan dan langkah pencegahan turut diambil termasuk operasi nyah kuman dan nyah cemar.

Dr Noor Hisham Abdullah, Ketua Pengarah Kesihatan

manakala 25 individu atau 83.3 peratus tidak menunjukkan sebarang gejala COVID-19," katanya.

Mengenai statistik semasa COVID-19, Dr Noor Hisham berkata,

54 kes pulih dilaporkan menandakan jumlah individu sudah pulih sepenuhnya sebanyak 7,400 kes atau 87.1 peratus daripada keseluruhan kes.

Beliau berkata, sehingga jam 12 tengah hari semalam 41 kes baharu dilaporkan dan ia menjadikan jumlah kes positif di negara ini 8,494 kes dengan kebolehhajangan 973 kes.

"Ingin dimaklumkan daripada 41 kes baharu dilaporkan, tiga adalah kes import warganegara yang mendapat jangkitan di luar negara.

"Daripada 38 kes penularan di dalam negara pula, 32 adalah bukan warganegara, manakala enam lagi membabitkan warganegara.

"Sehingga kini, empat kes positif COVID-19 sedang dirawat di unit rawatan rapi (ICU) dan tiada individu memerlukan bantuan pernafasan.

"Selain itu, tiada pertambahan kes kematian berkaitan COVID-19 dilaporkan hari ini (semalam).

"Justeru, jumlah kumulatif kes kematian COVID-19 di Malaysia kekal 121 kes atau 1.42 peratus daripada jumlah keseluruhan kes," katanya.

3.7 juta daftar, guna aplikasi MySejahtera dalam tempoh lapan minggu

Putrajaya: Hampir 3.7 juta rakyat Malaysia direkod mendaftar dan menggunakan aplikasi MySejahtera dalam tempoh lapan minggu sejak ia diperkenalkan Kementerian Kesihatan Malaysia (KKM).

Ketua Pengarah Kesihatan, Datuk Dr Noor Hisham Abdullah, berkata antara fungsi MySejahtera paling popular ialah ialah *hotspot tracker* atau penjejakan kawasan panas, selain penilaian sendiri dan statistik terkini COVID-19 di Malaysia, negara ASEAN dan seluruh dunia.

"Fungsi *hotspot tracker* digunakan 13.3 juta kali sejak pelancaran pada 20 April lalu. Ia membantu merancang pergerakan pengguna untuk mengelak kawasan Zon Merah, selain tujuan penilaian risiko kesihatan untuk tanggungan dan penilaian sendiri yang boleh dijalankan dari semasa ke semasa.

"KKM juga memperkenalkan fungsi terbaru, iaitu MySejahtera Check-In yang dilaksanakan secara rintis pada 1 Jun lalu dan digunakan secara meluas mulai 6 Jun.

"Fungsi ini mendapat sambutan hangat. Dalam masa 13 hari sahaja sebanyak 119,837 premis perniagaan mendaftar untuk kod QR dengan 10,006,857 daftar masuk lokasi dicatat di seluruh negara," katanya pada sidang media harian, di sini, semalam.

Mengulas lanjut, katanya statistik direkodkan aplikasi MySejahtera dianggap pencapaian membanggakan demi merealisasikan proses digitalisasi kesihatan di Malaysia," katanya.

Katanya, fungsi MySejahtera Check-In contohnya berkonsepkan *simple, safe dan secure* (mudah, selamat dan dilindungi).

"Ia senang digunakan kerana tiada borang manual diisi, sebaliknya pengguna hanya perlu mengimbas kod QR melalui aplikasi ini.

"Ia juga selamat kerana mengurangkan risiko jangkitan melalui sentuhan permukaan kerana tidak perlu berkongsi alat tulis dan mengurangkan tempoh menunggu untuk memasuki premis.

"Maklumat daripada pengguna juga dilindungi mengikut Akta Pencegahan dan Pengawalan Penyakit Berjangkit 1988 (Akta 342) dan hanya akan digunakan untuk pengesanan kontak jika diperlukan," katanya.

SOP kunjungan saringan ke rumah diperbaiki

Putrajaya: Kementerian Kesihatan (KKM) akan memperbaiki prosedur operasi standard (SOP) membabitkan lawatan warga kerjanya ke rumah, bagi tujuan melakukan ujian saringan kes COVID-19.

Ketua Pengarah Kesihatan, Datuk Dr Noor Hisham Abdullah, berkata antaranya dengan memastikan pesakit dihubungi terlebih dahulu sebelum kunjungan ke mana-mana rumah dilakukan.

Beliau berkata, kerjasama kedua-dua pihak perlu dilaksanakan di mana pesakit juga harus memainkan peranan dengan menghubungi Pejabat Kesihatan Daerah atau polis jika rasa curiga atau waspada kunjungan bagi tujuan ujian saringan.

Katanya, bagi warga kerja KKM pula, mereka harus memakai uniform dan membawa kad kuasa seperti ditetapkan dalam peraturan pihak kementerian.

"Kalau ada ketidakpastian ataupun rasa sangsi boleh hubungi pejabat kesihatan daerah, tetapi sepatutnya kita kena hu-

bungi mereka untuk dapatkan kepastian sama ada pasukan KKM ini dihantar ke rumah tertentu untuk pengesanan kes Yang disyaki (PUT) atau kes kuarantin di rumah.

"Contohnya, kalau jururawat datang ke rumah untuk merawat ibu dan bayi mereka memakai uniform dan ada kad kuasa baharu kita dapat memastikannya," katanya pada sidang media harian, di sini semalam.

Beliau berkata demikian mengulas maklumat tular di media sosial, mengenai beberapa individu mendakwa sebagai petugas KKM datang ke rumah untuk melakukan ujian calitan bagi COVID-19.

Dr Noor Hisham berkata, pihaknya terus menjalankan siasatan selepas maklumat itu tular dan hasilnya mendapati ia memang membabitkan warga kerja kementerian.

"Kes ini sudah selesai dan laporan polis pun sudah dibuat. Kita sendiri pada mulanya tidak pasti betul atau tidak kenyataan di Facebook itu, tetapi apa yang penting kita terus menjalankan siasatan," katanya.



Kakitangan KKM membuat pengesanan kes aktif dari rumah ke rumah untuk mengenal pasti penduduk yang mempunyai simptom COVID-19 di Kampung Baru pada 7 April lalu. (Foto Asyraf Hamzah/BH)